

FAK Internasionale Afrikaanse Geskiedenisolimpiade: Ronde 2

Graad 5

Die tweede ronde bestaan uit die volgende:

Fase 1: Skryf 'n opstel en maak 'n video. Dit moet teen **3 Augustus** ingestuur wees.

Fase 2: Die finale ronde 2-vraestel word op **29 Augustus** landwyd geskryf, by aangewysde punte wat later gekommunikeer sal word.

Fase 1: OPSTEL

Kies **EEN** van die volgende twee temas en skryf 'n opstel daaroor:

Opsie A: My familiegeskiedenis

Opsie B: As ek dit kon verander ...

Opsie A: My familiegeskiedenis

Elke familie het 'n unieke verhaal. Nou is dit jou kans om meer oor jou familie uit te vind en hulle storie met ons te deel.

Wat jy moet doen:

Voer 'n kort onderhoud met:

- 'n ouer;
- 'n grootouer; of
- 'n ouer familielid.

Vra hulle vrae oor julle familie se geskiedenis. Gebruik die inligting wat jy kry en skryf daarna 'n opstel van **300 tot 500 woorde**.

Oorweeg die volgende om diepte en konteks aan jou skryfstuk te gee:

- **Waar kom julle familie vandaan?** Vertel waar jou familie of voorouers oorspronklik gewoon het.

- **Wie was jou voorouers?** Noem 'n paar mense in jou familie wat lank voor jou geleef het.
- **Watter familieverhale word vandag nog vertel?** Vertel van 'n interessante of spesiale gebeurtenis wat julle familie graag onthou.
- **Het jou familie 'n held?** Vertel van iemand in jou familie wat iets besonders bereik het of 'n belangrike bydrae gelewer het.
- **Jou eie mening:** Verduidelik waarom jou familie se geskiedenis vir jou belangrik is.

Wenk vir 'n wenopstel:

Gebruik **2 tot 3 historiese feite**, soos jaartalle, datums of plekname wat jy tydens jou onderhoud ontdek het. As julle ou foto's, briewe of ander dokumente het, kan jy dit gebruik om jou familie se storie nog interessanter te maak.

of

Opsie B: As ek dít kon verander ...

Dink aan die geskiedenis wat julle hierdie jaar geleer het. Stel jou voor jy het 'n **tydmasjien** en kan na enige tydperk terugreis. Jy kry die kans om **een belangrike gebeurtenis of besluit** in die geskiedenis te verander. **Wat sal jy verander, en hoekom?**

Wat jy moet doen:

Skryf 'n verhalende geskiedenisopstel van 300 tot 500 woorde.

Oorweeg die volgende om diepte en konteks aan jou skryfstuk te gee:

- **Die tydperk:** Vertel na watter tyd in die geskiedenis jy terugreis.
- **Die gebeurtenis:** Verduidelik watter gebeurtenis of besluit jy wil verander.
- **Jou redes:** Waarom het jy hierdie gebeurtenis gekies?
- **Die nuwe geskiedenis:** Hoe dink jy sou die geskiedenis verander het as hierdie gebeurtenis anders verloop het? Hoe sou dit die mense van daardie tyd beïnvloed het?
- **Vandag:** Hoe dink jy sou Suid-Afrika of die wêreld vandag anders gewees het?

Wenk vir 'n wenopstel: Gebruik 2 tot 3 ware historiese feite om jou idees te ondersteun en te wys dat jy die tydperk goed verstaan. Daar is nie 'n regte of verkeerde antwoord nie. Ons wil sien hoe jy jou kennis van geskiedenis gebruik en kreatief kan dink.

Die opstel moet in Word-dokumentformaat na olimpiade@fak.org.za gestuur word.

Die dokument moet 'n Header bevat wat jou: Naam, Van, Graad, Skool, Provinsie en keuse van opstel bevat

Bv. Megan Davies, 8, AHMP, Gauteng, Opsie A

Die volgende is wat nasieners in ag sal neem om jou opstel te merk:

OPDRAG 1: OPSTEL (100 PUNTE)

Beoordelingsrubriek

Kategorie Punte

Inhoud en onderwerpbegrip	20
Geskiedkundige feite en navorsing	25
Kreatiwiteit en oorspronklikheid	15
Logiese struktuur en vloei	15
Persoonlike insig, argument of storievertelling	15
Taalgebruik, spelling en aanbieding	10
Totaal	100

En

Fase 1: Video – Geksiedenis Leef

Geskiedenis is oral om ons. Ou geboue, monumente en standbeelde vertel belangrike stories van die verlede. Nou is dit jou beurt om een van hierdie stories met ons te deel.

Wat jy moet doen:

1. Besoek 'n monument, standbeeld of geskiedkundige plek wat vir jou interessant is.
2. Neem **ten minste twee foto's** van die plek.
3. Maak 'n **video van 2 tot 4 minute** waarin jy die geskiedenis en betekenis van die monument, standbeeld of historiese baken verduidelik.

Oorweeg die volgende om diepte en konteks aan jou video te gee:

- **Die naam:** Wat is die naam van die monument, standbeeld of geskiedkundige plek?
- **Die ligging:** Waar is dit geleë? Noem die dorp, stad of plek.
- **Die geskiedenis:** Vertel die storie van die plek en noem **2 tot 3 historiese feite**, soos belangrike datums of jaartalle; mense wat iets daarmee te doen gehad het, of belangrike gebeurtenisse.
- **Waarom is dit opgerig?** Verduidelik waarom hierdie monument of geskiedkundige plek gebou is.

- **Jou mening:** Waarom dink jy is hierdie plek vandag nog belangrik?
- **Die toekoms:** Waarom moet ons hierdie plek vir toekomstige geslagte beskerm?

Wenk vir 'n spogvideo:

Gebruik jou foto's, kaarte of ander visuele hulpmiddels in jou video. Wees kreatief! Jy kan:

- aantrek soos iemand uit dié geskiedkundige tydperk;
- 'n kort toneel opvoer; of
- voorwerpe of rekwisiete gebruik om jou aanbieding interessanter te maak.

Moenie net feite voorlees nie. Vertel die geskiedenis met selfvertroue en gebruik jou eie woorde.

Onthou

Die beste inskrywings wys:

- goeie navorsing;
- korrekte feite;
- kreatiwiteit; en
- 'n interessante aanbieding.

Die video moet na olimpiade@fak.org.za gestuur word via WeTransfer!

Om jou te help WeTransfer gebruik kyk : <https://www.youtube.com/watch?v=gmzMsSCKj4E>

Dokument Titel (vir albei video en opstel moet) :

GO 2026: Leerder Naam en Van, Graad, Skool Naam , tipe

Bv. GO 2026: Megan Davies, 8, AHMP, video

Die volgende rubriek sal gebruik word om jou video te beoordeel:

OPDRAG 2: VIDEO-UITDAGING (100 PUNTE)

Beoordelingsrubriek

Kategorie	Punte
Geskiedkundige akkuraatheid en navorsing	30
Aanbieding en storievertelling	20
Kreatiwiteit en oorspronklikheid	20
Waarom die monument/baken bewaar moet word	10
Gebruik van feite, datums en historiese persone	10
Tegniese gehalte (klank, beeld en verstaanbaarheid)	10
Totaal	100

Wys jou passie vir die geskiedenis en verras ons met jou kreatiwiteit, navorsing en aanbieding! Die beste inskrywings is dié wat goeie navorsing met kreatiewe aanbieding kombineer. Maak seker dat jou feite korrek is, jou bronne betroubaar is en dat jy trots is op die werk wat jy indien. Dit is belangrik dat dit jou eie, oorspronklike werk is.

Ons sien uit daarna om jou unieke geskiedenisverhaal te ontdek!